

國朝先正事略

國朝先正事略卷之二十七 名儒

平江李元度次青集

孫夏峯先生事略 子博雅 魏一濫

先生諱奇逢字啟泰一字鍾元直隸容城人晚講學蘇門之夏  
峯學者稱夏峯先生少與定興鹿忠節公善繼友以聖學相砥  
礪年十四謁楊尚寶補庭補庭間設在圍城中內無儲備外無  
救援當若何先生應聲曰效死勿去補庭忠愍公子也十七舉  
萬厯庚子鄉試居京師與左忠毅公光斗魏忠節公大中周忠  
介公順昌相尚以氣節丁內外艱喪葬一準古禮率兄弟廬墓  
凡六年學使李蕃以純孝疏旌其門家故貧日食常不繼嘗與

言從憂患困鬱中默識心性本原生平得力實在此大赦五年  
逆閹魏忠賢亂政大興鉤黨獄左忠毅魏忠節周忠介先後被  
逮左公弟光明魏公子學洙皆主鹿氏鹿忠節之父正世所稱  
鹿太公者也與先生及新城張果中各出身營救當是時高陽  
孫文正公承宗以樞輔督師榆關鹿忠節以職方郎贊軍事初  
嘗約先生至軍中徧覽山海形勝孫公將疏請任以贊畫先生  
語茅元儀曰古未有將相不合能立功於外者公信不愧吉甫  
矣奈時不可何乃辭歸至是爲書抵孫公使季弟奇彥及正孫  
化麟齋以往書略曰左魏諸君子清風大節必不染指以鹿罪

大此何待言獨以善類之宗直臣之首橫被奇冤自非  
心誰不扼腕惟桑與梓固浮邱舊渚地也遺愛在人不

之士興歌黃鳥昔盧次樞一葬男子耳謝茂秦以眇布衣行哭  
燕市謂元美等曰諸君子不生爲盧生地乃從千載下哀湘而  
弔賈平李獻吉在獄何仲默致書楊遂菴求爲引手康德涵義  
激同調至不自愛其名浮邱廓園之品固當直踞獻吉何次樞  
之敢望某能無哭訴尙負慙於茂秦執事功德前無遂菴憐才  
扶世之感稍一引手且有出德涵上者况諸君子以道義臭味  
之雅愛知於執事最深且人豈無意乎孫公得書具疏請入朝  
面陳機務忠賢大懼謂且興晉陽之甲夜遶御牀泣遂以嚴旨

過諸途尋誣左魏受熊經略贓各榜追之左嘗督學三輔又治屯田有惠政先生與鹿太公及果中謀設匭建表於門曰願輸金救左督學者聽於是投匭者雲集得金數千齎入都而左魏已先斃杖下明年忠介公逮至擬贓五千先生復爲營畫得金數百而忠介復杖斃矣乃皆經紀其喪且按籍還金時邏校嚴急士大夫觸手糜爛容城去京師不二百里舉旛擊鼓衆皆爲先生危而忠賢左右皆近畿人夙重先生質行無不陰爲之地者以故卒免禍左魏遺骨藉以歸海內有范陽三烈士之稱謂先生及正果中也先生義聲震一世御史黃宗昌給事中王正志交薦之屢徵不起崇禎九年大清兵薄容城先生率兄弟

族黨入城。與有司及薦紳分城守禦。先生獨領西北隅。雉堞久  
圯。兵突至。隨禦隨築。鄰邑多陷。而容城獨完。巡撫張其平上其  
事。詔優秩擢用。會南都兵部尙書范公景文亦以贊畫軍務。馳  
聘先生俱辭之。時畿內盜賊數駭。先生率子弟門人入易州五  
公山。結茅雙峯。戚族相依者數百家。乃飭戎器。待糗糧。部署守  
禦。又以其暇賦詩習禮。絃歌聲相聞。寇盜屏跡。時以方田子春  
之在無終山焉。國朝順治初。祭酒薛公所蘊具疏讓官。以許  
文正相擬。遂有旨以國子監祭酒徵。有司敦趣卒固辭。兵部  
侍郎劉公餘祐巡按御史柳寅東陳蜚交章薦皆堅臥不應。自  
有明及本朝前後十一徵不起。天下士識與不識皆稱曰徵。

君晚歲渡河慕蘇門百泉之勝且爲康節魯齋講學地水部郎  
馬光裕奉以夏峯田廬遂移家築堂曰兼山讀易其中率子弟  
躬耕四方來學願畱者亦授田使耕所居成聚公卿持使節過  
衛源輒屏駟從以一見先生爲快而睢州湯文正公斌官嶺北  
道告養歸遂從受業凡十年始先生與鹿忠節講學以象山陽  
明爲宗晚更和通朱子之說其持身務自刻砥而與人無町畦  
每晨起謁先祠畢澄心端坐雖疾病未嘗有惰容有問學者隨  
其高下淺深必開以性之所近使自力於庸行上自公卿大夫  
及野人牧豎工商隸圉武夫悍卒壹以誠意接之用此名在天  
下而人無忌嫉者山中花放鄰村爭置酒相邀咸知愛敬居夏

峯二十五年卒年九十有二康熙十四年四月二十一日也先  
主嘗語學者吾始自分與楊左諸賢同命及涉亂離犯死者數  
矣而終無恙是以學貴知命而不惑也其學以慎獨爲宗而於  
人倫日用閒體認天理嘗言喜怒哀樂中節視聽言動合禮子  
臣弟友盡分乃終身行之不能盡者又言自七十以往每閱十  
年而功加密惟獨知之地不敢自欺無或懈而已著有四書近  
指讀易大旨書經近旨聖學錄兩大案錄甲申大難錄家禮酌  
歲寒居答問孝友堂家乘畿輔中州人物考取節錄孫文正公  
年譜乙丙紀事又著理學宗傳表周程張邵朱陸薛王及羅念  
庵顧涇陽爲十一子別爲諸儒考附之蓋出獨見非依傍舊聞



者比也。河南北學者歲時奉祀百泉書院。易州學者就故宅爲雙峯書院。而容城與劉靜修楊忠愍同祀。保定與孫文正鹿忠節並祀。道光八年詔從祀孔子廟庭。弟奇彥順治中以貢生知武城縣。有聲于六四子。博雅最知名。孫淦康熙壬戌進士官中書。以孝聞。

博雅字君僑。幼端重不苟嬉笑。甲申後屏舉子業。絕意仕進。徵君遷蘇門。君獨畱貧無以炊。賒柿餅以供母。徒步奉至蘇門。徵君撫之喜。作詩勞之。母病不交睫。不解襟帶者三旬餘。及卒爲孺子泣三年。不見齒。徵君年漸高。偕兄弟朝夕上食祝嘏。噎夜則更臥牀前。候其欠伸未嘗頃刻離時。從徵君游者日眾。有數

百里或數千里至者。君設榻供食。各得其宜。徵君晚年重聽。諸弟子問難。必藉君轉達。反覆開示。不厭。徵君著書不下數百卷。嘗數易稿。皆君手書。字體古健。無一筆苟。康熙八年。詔舉山林隱逸。郡守程啟朱以君名上之。大府君以父年老力辭。亡何徵君卒。偕兄望雅弟韻雅廬墓三年。哀毀骨立。葬祭以禮。君德器純粹。與人交和易可親。見人一善。贊揚不去口。人有過。不顯言。默然端坐。閒引一二古語。相感發。聽者聳然。多見省。改問以時事。似不甚別白。至談古今成敗得失。瞭若指掌也。韻雅坐事被逮。繫刑部獄。凡五年。將遠徙。君具橐餽以從。病致藥餌。更周卹。其同繫者。幸朝夕相顧視。君故貧。竭產供弟。故交所贈遺。皆

拒。不。納。同。難。有。械。繫。者。君。以。蹇。驢。讓。之。徒。步。烈。日。兩。足。皆。腫。嘗。  
遇。暴。風。雨。失。道。幾。溺。死。饑。渴。困。頓。遂。病。每。假。寐。口。中。喃喃。皆。其。  
弟。事。也。頃。之。竟。不。起。彌。留。猶。張。目。曰。吾。弟。免。矣。遂。卒。年。五。十。有。  
五。不。數。日。弟。事。漸。解。竟。免。流。徙。士。大。夫。高。其。義。稱。文。孝。先。生。所。  
著。曰。約。齋。集。子。漢。有。文。名。

魏君一黿字蓮陸直隸新安人夏峯高第弟子也嘗宦山西官  
知州有惠政搜訪隱逸折節下士及去官匹馬雙僮而已蓮陸  
與清苑高鐱范陽耿極等從徵君游最早遭時喪亂患難與共  
者餘三十年及徵君遷蘓門蓮陸自山右歸率間歲一至每至  
必數月留後構雪亭於夏峯爲徵君訂正年譜白雪盈山孤燈

午夜上下古今視千秋如旦暮及門問答語蓮陸爲多所著曰  
雪亭夢語湯潛庵先生官京師時蓮陸嘗策蹇訪之見潛庵繩  
床破被數椽不蔽風雨慨然曰此猶見雪亭風味也因出夢語  
讀之屬潛庵爲之序初徵君命蓮陸輯北學編尋命潛庵輯洛  
學編潛庵嘗以雪亭比朱子之寒泉精舍云

黃梨洲先生事略 弟宗炎 宗會

黃梨洲先生宗羲字太冲浙江餘姚人明御史忠端公尊素長子忠端爲楊左同志以劾魏闖死詔獄莊烈帝卽位先生年十九袖長錐入都訟冤至則逆闖已磔卽具疏請誅曹欽程李實會庭鞠許顯純崔應元先生對簿出所袖錐錐顯純流血被體又毆應元拔其鬚歸祭忠端神主前又錐殺卒卒葉咨顏仲文蓋忠端絕命二卒手也時欽程已入逆案實訴辨原疏非已出陰致三千金賄先生求勿質先生發其事復於對簿時錐之獄竟偕諸忠子弟設祭獄門哭聲達禁中莊烈帝歎曰忠義孤兒可念也先生歸益肆力於學經史百家無所不窺憤科舉之學

錮人思所以變之。既盡發家藏書讀之。不足。則鈔之。同里世學樓鈕氏澹生堂。祁氏南中。則千頃齋黃氏絳雲樓錢氏。且建續鈔堂於南雷。以承東發之緒。山陰劉忠正公倡道戴山。奉忠端遺命從之遊。而是時越中承海門周氏之緒。餘援儒入釋。石梁陶氏奭齡爲之魁。姚江之緒大壞。先生約吳越中高材生力摧其說。故戴山弟子如祁忠敏公彪佳。章給事正宸。皆以名德重。而四友禦侮之助。必首先生。鼓山之學專言心性。而漳浦黃忠端公兼及象數。人比之程邵兩家。先生曰。是開物成務之學也。乃出所學律歷諸書相質證。弟宗炎宗會並負異才。先生自教之。有東浙三黃之目。及周延儒再召。謀翻逆案。起馬士英督鳳

陽爲阮大鍼地。於是南太學諸生作畱都防亂公揭。斥大鍼陳公子貞慧。沈徵君壽民。吳秀才應箕。沈上舍士桂。共議東林子弟。推無錫顧杲居首。璫禍諸家推先生爲首。餘以次列名。戊寅秋七月事也。壬午先生入都。延儒欲薦爲中書舍人。力辭免。偶遊市中。聞鐸聲曰。非吉聲也。遂南下。已而大清兵果入塞。甲申難作。大鍼驟起南中。案揭中姓氏。得百四十人。將盡殺之。先生同里有閭黨首劾劉忠正公。及其三大弟子。則祁章二公暨先生也。先生與杲並逮。太夫人嘆曰。章妻滂母。乃萃吾一身耶。會大兵下南都。先生得免。踰險歸浙東。時忠正公已死。節弟子多殉之。而孫公嘉績。熊公汝霖。以一旅之師。畫江而守。先生

糾里中子弟數百人從之。號世忠營。請以布衣參軍事。不許。授職方郎尋。改御史作監。國魯元年。大統歷頒之浙東。馬士英奔於國安營。欲入朝。眾言其當誅。熊公恐其挾國安爲患也。好言慰之。先生曰。諸臣力不能殺耳。春秋之孔子。豈能加於陳桓。但不謂其不當誅也。熊公謝焉。又遺書王之仁曰。諸公何不沈舟決戰。由赭山直趨浙西。而日於江上鳴鼓攻其有備。蓋意在自守也。叢爾三府。以供十萬之眾。必不支。何守之能爲。聞者皆臆其言而不能用。惟熊公嘗再以所部西行。下海鹽。至是孫公以火攻營。卒付先生。與王正中合軍。得三千人。正中者。之仁從子也。以忠義自奮。先生深結之。使之仁不得撓軍事。職方郎查繼



佐軍亂先生定之挈以西遂渡海割潭山陳太僕潛夫以軍間  
行議由海道入太湖招吳中豪傑抵乍浦約崇德義士孫葵等  
內應會大兵纂嚴不得前而江上已潰公歸入四明山結寨  
自固餘兵尙五百人先生駐兵杖錫寺微服出訪監國戒部下  
善與山民結部下不盡遵節制山民畏禍潛焚其寨部將茅翰  
汪涵死之先生無所歸捕檄累下攜子弟入剡中己丑聞監國  
在海上乃與都御史方端士赴之授左副都御史亡何大兵  
圍健跳城中危急置靴刀待命會蕩湖伯阮駿救至得免時諸  
帥之悍甚於方王文臣稍異同其間立致禍熊公以非命死劉  
公中藻以失援死錢公肅樂以憂死先生旣失兵日與吳尙書

鍾繼坐舟中。正襟講學。暇則注授時泰西回回三曆而已。先生之從亡也。太夫人尙居故里。當事錄其家口。先生曰。方寸亂矣。吾不能爲姜伯約也。乃陳情變姓名。閒行歸家。是年監國自健跳至翁洲。復召先生。副馮侍郎京第乞師。日本抵長埭。不得請。自是東遷西徙。無甯居。而浙中當事得名籍與海上存連者。卽行彌雍。先生於故國位在列卿。江湖俠客多來投。而馮侍郎等結寨杜畧。卽先生舊部。風波鎮撼無虛日。先生猶挾帛書欲招婺中鎮將南援。時方捕諸寨之通海者。山寨諸公相繼死。弟宗炎坐與馮侍郎交通。刑有日矣。先生以計脫之。辛卯遣閒使入海告警令爲之備。甲午定西侯張名振閒使至。被執。又名捕先

生丙申慈水寨主沈爾緒禍作亦以先生爲首其得不死皆有  
天幸先生氣不懾也其後海上傾覆先生無復望乃奉太夫人  
返里門畢力著述而四方請業之士漸至矣自言受學葢山時  
頗喜爲氣節斬斬一流患難後始多深造而追恨爲過時之學  
下未復舉證人書院申葢山之緒已而之鄞之海甯巡撫張公  
以下皆請開講先生不得已應之先生謂明人講學襲語錄之  
糟粕不以六經爲根柢教學者必先窮經而求事實於諸史又  
謂讀書不多無以證斯理之變化多而不求諸心則爲俗學蓋  
先生以濂洛之統綜會諸家橫渠之禮教康節之象數東萊之  
文獻艮齋止齋之經術水心之文章莫不旁推交通自來儒林

所未有也。康熙戊午，詔徵博學鴻儒。葉學士方藹擬疏薦陳  
庶常錫嘏曰：是將使先生爲疊山九靈之殺身也。力止之。會修  
明史，徐學士元文謂先生非可召試者。然或可聘之修史。乃與  
興化李公清同徵。詔督撫以禮敦遣。先生固辭。朝廷知不  
可致，特詔浙中督撫抄先生著述，關史事者送京師。徐公延  
先生子百家及萬處士斯同、萬明經言任纂修。皆先生門人也。  
先生以書報徐公，且諧之曰：昔聞首陽山二老託孤於尙父，遂  
得三年食薇顏色不壞。今吾遺子從公，可以置我矣。當是時，  
聖祖表章儒術，大臣多鉅人長德，顧皆以不能致先生爲恨。魏  
公象樞曰：生平願見不得者三人，夏峯、梨洲、二曲也。湯公斌曰：

黃先生論學如大禹導水導山脈絡分明吾黨之斗杓也庚午徐尙書乾學侍直

上訪及遺獻復以先生對且言曾經臣弟元文疏薦老不能來上曰可召至京朕不授以事卽欲歸當遣官送之徐公對以篤老無來意

上嘆息不置先生卒於康熙乙亥秋年八十有六初營生壙於忠端墓旁中置石牀無棺槨作葬制或問援趙邠卿陳希夷例戒身後無得違命蓋自以遭家國之變期於速朽而不欲顯言其故也所著有明儒學案六十二卷三百年儒林之藪也易象數論六卷力辨河洛方位圖象之非授書隨筆一卷則閤徵君

若璩問尚書而告之者。春秋日食歷一卷。辨衛璞所言之謬。律呂新義二卷。則嘗取餘杭竹管。肉好停勻者。斷之爲十二律。及四清聲。試之。因廣其說者也。又以葢山有論語大學中庸解。獨闕孟子。乃疏爲孟子師說四卷。嘗欲重修宋史。未就。存叢目補遺三卷。輯明史案二百四十四卷。贛州失事一卷。紹武爭立紀一卷。四明山寨紀一卷。海外痛哭紀一卷。日本乞師紀一卷。舟山興廢一卷。沙定洲紀亂一卷。賜姓本末一卷。又汰存錄一卷。糾夏考功。幸存錄者也。歷學則少有神悟。及在海島。古松流水布算。較較嘗言句股之法。乃周公商高之遺。而後人失之。使西人得以竊其傳。有授時歷注一卷。大統歷推法一卷。授時歷假

如一卷。西歷回歷假如各一卷。外尚有氣運算法。勾股圖說。開方命算測圖要義。共若干卷。其後梅徵君文鼎本周髀言歷世驚爲絕學。實先生開之。南雷文案十卷。外集一卷。吾悔集四卷。撰杖集四卷。蜀山集四卷。子劉子行狀二卷。詩歷四卷。忠端祠神弦曲一卷。後分爲南雷文定凡五集。晚年又定爲南雷文約。合之得四十卷。明夷待訪錄二卷。留書一卷。則佐王之略。顧先生炎武見而嘆曰。三代之治可復也。思舊錄二卷。中多庀史之文。又選朋文案。廣之爲明文海。共四百八十二卷。閎明人文集二千餘家。自言與十朝國史相首尾。而別屬李徵君鄴嗣爲明詩案。未成而李卒。又輯宋元儒學案。以志七百年儒苑門戶。又

嘗續宋文鑑元文抄以補蘇呂二家之闕。未成編卒。又以蔡正甫之書不傳。作今水經。其餘四明山志。台宕紀游。匡廬游錄。姚江文略。姚江瑣事。補唐詩人傳。病榻隨筆。黃氏宗譜。黃氏喪制。及自著年譜。共若干卷。先生交不名一家。晚年忽愛謝皋羽。所處之境同也。雖不赴徵車。而史局大議。必咨先生。歷志出吳檢討。任臣之手。總裁千里遺書。乞審正而後定。嘗論宋史別立道學傳。爲元儒之陋。明史不當仍其例。朱檢討彝尊適有此議。湯公斌出先生書示眾。遂去之。於國難諸公表章尤力。至遺老之以軍持自晦者。久之或嗣法開堂。先生曰。是不甘爲異姓之臣者。反甘爲異姓之子也。故所許止四明周囊雲一人。弟宗魯晚



年好佛。爲反覆言其不可。於二氏之學。雖其有託而逃者。猶不  
少寬焉。晚年益好聚書。所抄自鄞之天一閣。范氏歛之叢桂堂。  
鄭氏禾中倦圃。曹氏最後則吳中傳是樓。徐氏然嘗。戒學者當  
以書明心。無玩物喪志也。子百家。字主一。能世其學。又從梅定  
九問推步法。著勾股矩測解源二卷。

宗炎。字晦木。世稱立谿先生。崇禎中以明經貢太學。學行與伯  
兄梨洲埒。而寡岸幾過之。己卯秋試報罷。與弟宗會約閉關盡  
讀天下之書。而後出。畫江之役。步迎監國於蒿壩。兄弟毀家率  
子弟僮僕荷戈。婦女皆執爨以餉。所謂世忠營也。梨洲西下海  
昌先生。乃留龕山治輜重。事敗。狂走入四明山。爲馮侍郎京第

參軍事。奔走諸寨間。順治庚寅。山寨軍殲。被縛。侍郎之嫂先生妻母也。匿其家事。發當論死。梨洲還至鄞。謀以計活之。馮尙書子道濟。故人也。慨然任其責。臨刑日。晡矣。道濟潛載死囚隨之。亡。何火忽滅。暗中有突出。負先生去者。不知何許人也。火至。以囚代之。冥行十里許。始息肩。則萬戶部履安白雲莊也。負之者戶部子程也。時諸遣民畢集。解縛置酒。忽管弦聲出。隔岸先生掉小舟往。因自取琴彈之。曰。廣陵散。幸無恙。侍郎故部尋復合。先生仍左右之。慈湖寨主沈爾緒。又以孥寄丙申。再遭名捕。梨洲嘆曰。死矣。故人朱湛侯諸雅。六力救之。免。遂提藥籠遊海昌石門間。或以古篆爲人鐫石印。或用李思訓趙伯駒畫法。鵲之。

以自給。浙西傳爲黃高士畫。爭購之。生平作詩幾萬首。沉寃憤結。晚稍頽唐。於象緯律呂軌革壬遁之學。皆有神悟。著周易象辭二十一卷。尋門餘論二卷。圖書辨惑一卷。力闢先天太極圖說之非。謂周易未經秦火。不應獨禁其圖。轉爲道家藏匿。二千年至陳搏而始出。謂搏之圖書。乃道家養生之術。與元陳應潤說合。謂周子太極圖說。圖雜以仙真說。冒以易道。亦與朱竹垞毛西河所考略同。晚年以石函錮所著述於其中。語其子曰。有急則埋之。丙舍如其言。子卒。途莫知所在。宗會字澤望。號縮齋。學者稱石田先生。所學同性。尤狷介。國變後。隱於浮屠。浪遊名山。以疾終。生平讀書一再過不忘。日必盡百頁。有事則次日倍。

其常課自經史四部外釋道二藏未嘗不一周也詩文古澹而有根據所著曰縮齋集

李二曲先生事略

李柏

王心敬

陸卿鶴

孫景烈

馮雲程

先生先世無達者。父可從字信吾。以壯武從軍爲材官。崇禎壬午。督師汪公喬年討賊。信吾從監紀孫兆祿以行。臨發。挾一齒。與其婦彭曰。戰危事。不捷當委骨沙場。子其善教兒矣。亡何。督師死事。信吾衛監紀不克。亦死。彭聞報。欲身殉。以子幼。制淚撫之。然無以爲生。或謂彭曰。可令兒傭。取直以養。或令給事縣庭。彭不可。令先生從師學。修脯不具。皆謝之。彭曰。經書固在。何必師。時先生年十六。祖解文義。母夫人日言忠孝節義事以督之。母子相依。或數日不舉火。泊如也。先生以昌明關學爲己任。家無書。從人借讀。自經史百家至二氏之書。無不觀。其論學曰。天

下大根本。人心而已矣。大肯綮。提醒天下之人心而已矣。是故天下治亂。視人心。人心邪正。視學術。凡學在反身道在守約。功在悔過。自新而必自靜坐觀心。始靜坐乃能知過。知乃能悔。悔乃能自新。又言學者當先觀象山慈湖陽明白沙之書。闡明心性。直指本初。以洞斯道之大源。然後取二程朱子及康齋敬軒涇野整庵之書。玩索以盡踐履之功。否則醺謹者之通慧。穎悟者雜異端。無論言朱言陸。皆於道未有得也。於是關中士爭向先生問學。關學自橫渠後三原涇野少墟累作累替。至先生而復盛。當事慕其名。踵門求見。力辭不得。則一見之。終不報謁。曰。庶人不可入公府也。再至。并不復見。有餽遺者。雖十反亦不受。

或曰。交道接禮。孟子不卻。唯何甚。曰。我輩百不能學孟子。卽此一事。稍不守孟子家法。何害。當事請主關中書院。先生嘗謀爲馮恭定公設俎豆。勉就之。已而深悔。急去之。陝撫白君欲薦諸朝。哀籲得免。督學許君孫荃。議進其所著書。亦不可。然關中利害在民者。未嘗不爲當事力言也。少墟高弟。隱淪不爲世所知者。言之當事。表其墓。以傳之初。母夫人葬。信吾之齒。曰。齒塚。以待身後合葬。先生累欲之。襄城招魂。以母老不敢遠出。乙巳。母夫人卒。庚戌。徒跣之襄城。徧覓遺蛻。不得。乃爲文。禱於社。服斬衰。晝夜哭不絕聲。淚盡。繼以血。襄城令張允中出迎。請適館。不可。乃亦爲之禱。卒不得。先生設招魂之祭。狂號允中。請立信吾。

祠。且。造。塚。故。戰。場。以。慰。孝。子。心。揚。州。守。駱。鍾。麟。前。令。蓋。屋。時。師。事。先。生。者。也。聞。先。生。至。襄。城。謂。祠。事。未。能。旦。夕。竟。請。南。下。謁。道。南。書。院。以。發。顧。高。諸。公。書。且。講。學。以。慰。東。林。學。者。之。望。先。生。應。之。從。者。雲。集。開。講。於。無。錫。於。江。陰。於。靖。江。宜。興。晝。夜。不。獲。休。忽。靜。中。涕。下。如。雨。搥。胸。自。誓。曰。不。孝。汝。此。行。爲。何。事。竟。喋。喋。於。此。閒。尙。爲。有。人。心。者。乎。雖。得。見。高。顧。諸。公。書。何。益。申。旦。不。寐。卽。戒。行。時。祠。事。且。畢。急。詣。襄。城。宿。祠。下。夜。分。鬼。聲。大。作。悽。愴。悲。涼。蓋。先。生。祝。於。父。祠。願。以。五。千。國。殤。魂。同。返。關。中。故。也。允。中。乃。爲。先生。設。祭。上。祀。督。師。在。公。監。紀。孫。公。配以。信。吾。下。設。長。筵。徧。及。死。事。者。先。生。伏。地。大。哭。觀。者。皆。哭。於。是。立。碑。曰。義。林。奉。招。魂。之。主。



取。豕。土。而。歸。告。於。母。墓。附。齒。家。中。更。持。服。如。初。喪。崑。山。顧。甯。人。  
作。襄。城。紀。異。詩。傳。寫。徧。海。內。癸。丑。陝。督。鄂。善。以。隱。逸。薦。先。生。誓。  
死。辭。書。入。上。皆。以。病。爲。解。得。旨。俟。病。愈。敦。促。入。京。自。是。大。吏。  
歲。歲。來。問。起。居。先。生。遂。稱。廢。疾。長。臥。不。起。戊。午。部。臣。以。海。內。真。  
儒。薦。有。旨。召。對。時。詞。科。薦。章。徧。海。內。先。生。獨。被。昌。明。絕。學。之。  
目。中。朝。必。欲。致。之。大。吏。趣。行。益。急。先。生。固。稱。疾。篤。舁。其。牀。至。  
行。省。大。吏。親。至。榻。前。慫。與。先。生。絕。粒。六。日。至。欲。拔。佩。刀。自。刺。於。  
是。諸。官。屬。大。駭。得。予。假。治。疾。先。生。嘆。曰。生。我。名。者。殺。我。身。是。皆。  
生。平。洗。心。未。密。不。能。自。晦。之。所。致。也。當。道。知。其。不。可。屈。姑。置。之。  
自。是。荆。扉。反。鎖。不。復。與。人。接。惟。顧。甯。人。至。則。款。之。已。而。

天子西巡將召見命陝督傳旨先生驚泣曰吾其死矣辭以廢疾不至遣子慎言詣行在進所著四書反身錄二曲集御書闕中大儒四字以寵之先生學極博嘗著十三經糾繆廿一史糾繆及象數諸書既自以爲近於口耳之學不復示人惟以反身錄示學者晚年遷富平學者日至然或才士著書滿家先生竟扃戶不納積數日悵然去或出自市廛下戶先生察其心之不雜引而進之當是時北則孫先生夏峯南則黃先生梨洲西則先生時論以爲三大儒然夏峯自明時已與楊左諸公爲石交其後孫高陽相國折節致敬易代後聲名益大梨洲爲忠端之子蕺山之高弟又從亡海上資望皆素高先生起自孤

童上接關學六百年之統寒饑清苦中耿光四出無所憑藉拔地倚天視二先生爲尤難云先生名顒字中孚自署曰二曲土室病夫陝西蓋屋人子二慎言慎行慎言以門戶故出補諸生終不與科舉後以選拔貢太學亦不赴先生晚年因兵氛遷寓富平與富平李因篤鄜縣李柏稱關中三李門人王心敬能傳其學因篤自有傳

柏字雪木少孤貧稍長讀小學曰道在是矣遂盡焚帖括而日誦古書家人強之應試遂出走西踰汧南入棧道東登首陽拜夷齊墓復以母命就試補諸生旋棄巾服入太白山讀書十年成大儒公卿多欲薦之度不獲行已志卒辭謝昕夕謳吟拾山

中櫛葉書之門人。都其集曰櫛葉集。山居力耕。日食粥。或半月食無鹽。意夷然不屑也。嘗言古之人有七日不火食者。有三旬九餐者。有食木子橡栗者。有屑榆者。有一日長坐者。有十九年餐糗啗雪者。蓋有主於中。不勤於外。所謂不忘溝壑也。其高寄絕俗類。此年六十六卒。子曰崧女適二曲。子慎言。

心敬字爾緝。號澧川。鄆縣人。少傳二曲之學。二曲集二十二卷。皆其所摭次也。少爲邑諸生。歲試提學遇之。不以禮發。憤脫巾幘去。遂出其籍。雍正中。詔舉賢良方正。總督額忒倫年羹堯先後上章薦。兩徵不起。及羹堯爲大將軍。復招之。卒謝不往。羹堯敗。出其門下者皆絀誤。或禁錮終身。澧川不與也。朱高安督

學關中。數造廬。請益焉。灋川學問淹通。有康濟之志。集中論選舉軍餉馬政區田法園田法井利說諸篇。皆可坐言起行。非空談心性者比。子某以知縣入都。

世宗見而嘉之。曰。若儒子。故自不凡。乾隆元年蒲城進士某應廷試。大學士鄂爾泰公問灋川安否。進士素昧灋川。不能對。鄂公笑曰。若不識關中儒者。乃亦成進士耶。秦中新除大吏來。及星華過境。鄂公必寄聲候灋川。動定其見重當世如此。生平論學以明新止至善爲歸。著有灋川集。關學綴灋川易說。江漢書院講義及語錄。

孫先生景烈者。字西峯。武功人也。少舉於鄉。爲商州教官。勤於

課上不受諸生一錢。雍正中舉賢良方正。乾隆己未成進士。授檢討。以言事忤旨。放歸。深自韜晦。陳文恭撫陝奉詔舉經明行修之士。將以西峯應。固辭。主關中書院。教生徒。以克己復禮居平。雖盛暑必肅衣冠。韓城王文端杰其入室弟子也。嘗曰。先生冬不鑪。夏不扇。如邵康節。學行如薛文清。爲關中學者宗。有自來矣。又郿縣馮先生雲程。字海鵬。號峪泉子。生七歲而孤。感奮自立。嘗謂生平有友五人。同邑則雪木李子。蓋屋則名世趙子。鄠縣則灃川王子。晚得一人。爲蓋屋司訓。劉子。又繼得灋灋之友方白趙子。二曲先生。爲之傳。又同時有蓋屋惠含貞先生。思誠武進陸儔公先生。卿鶴。二曲皆爲之傳。盛稱其學行云。

顧亭林先生事略 張弼 吳任臣

亭林先生初名絳字甯人江南崑山人乙酉改名炎武自署蔣山傭本生父同應有同祖弟曰同吉早世聘王氏未婚守志以先生爲之後母夫人最孝嘗斷指療姑疾崇禎九年旌於朝丁亥夏避兵常熟年六十矣謂先生曰我雖婦人然受國恩矣遇變我必死之於是先生方應邑令楊永言之辟與嘉定吳其沆同里歸莊共起兵奉故鄣撫王永祚以從夏文忠允彝於吳中魯王監國授先生兵部司務事旣不克永言行遁去其沆死之先生與莊幸得脫母夫人聞兩京皆破遂不食卒遺命誡先生勿事二姓次年唐王起閩中以職方郎召先生欲赴之念母

未葬不果。次年，幾豫吳兆勝之禍。更欲赴海上。道梗不前。庚寅，有怨家欲陷之。乃變衣冠作商賈，游京口。又游禾中。次年之舊都謁孝陵。癸丑，再謁其冬。又謁而圖焉。顧氏有三世僕曰陸恩，叛投里豪丁酉先生。四謁孝陵，歸持之急。乃欲告先生通海。先生亟往擒之，數其罪，湛之水。僕壻復投里豪，以千金賄太守，欲殺先生。勢危甚，有代乞援於錢牧齋者。牧齋欲先生自稱門下，乃許之。其人知必不可，而懼失援，乃私自書刺與之。先生急索刺，還不得。則列揭通衢，自白。牧齋亦笑曰：甯人之下也。會故相路文貞振飛之子澤溥爲白其事。於是先生浩然有去志。至是五謁孝陵，乃東行。舉田於章邱之長白山下，以自給。戊戌徧遊。



北畿出山海關歸至昌平。拜謁長陵以下。次年再謁。又念江南山水有未盡者。復歸。六謁孝陵。東遊至會稽。次年復北謁思陵。由太原大同入關中。至榆林。是歲漸中。史禍作。先生幸得脫。甲辰四謁思陵畢。墾田於雁門之北。五台之東。初先生之居東也。其地溼。不欲久留。每言馬伏波田疇皆從塞上立業。欲居代北。嘗曰。使吾澤中有牛羊。干江南不足懷也。然又苦其地寒。乃經營創始。使門人輩司之。而身出游。丁未之淮上。次年自山東入京師。萊之黃氏有奴告其主所作詩者多株連。復以吳中陳濟生所輯忠義錄指爲先生作。首之書中有名者三百餘人。先生聞之。馳赴山東自請勘。頌繫數月。富平李因篤親至。厯下解之。

獄口復如京師。五謁思陵。自是往還河北諸邊塞者凡十年。丁巳六謁思陵。始卜居陝之華陰。始先生徧觀四方。心耿耿未下。謂秦人慕經學。重處士。持清議。實他邦所少。而華陰綰轂關河之口。雖足不出戶。而能見天下之人。聞天下之事。有警入山守險。不過十里之遙。若志在四方。則一出關門。亦有建瓴之便。乃定居焉。王徵君宏撰築室延之。先生置田五十畝於華下。供晨夕。而東西開墾所入。別貯之以備有事。又餌沙苑蒺藜而甘之。曰。啖此久不肉不茗可也。熊公賜屬方任史事。以書來招。答曰。願以一死謝公。最下則逃之世外。懼而止。戊午鴻詞科。詔下。諸鉅公爭欲致之。先生以死辭。次年修明史。又欲薦之。貽書葉

學士方藹。誓以身殉。始得免。華下諸生請講學。謝之曰。近日三  
曲。徒以講學故得名。遂招逼迫。幾凶死。名之爲累甚矣。况東林  
覆轍有進於此者乎。少讀宋史。劉忠肅傳曰。士當以器識爲先。  
一命爲文人。無足觀矣。卽終身謝絕應酬。文字李二曲求爲其  
母傳。至再三終謝之。嘗曰。文不關於經術政理之大。不足爲也。  
韓公起八代衰。若但作原道諫佛骨表。平淮西碑。張中丞傳後  
序諸篇。而一切諛墓之文。不作。豈不誠山斗乎。今猶未也。其論  
學。則曰。諸君關學之餘也。橫渠藍田之教。以禮爲先。孔子嘗曰。  
博學於文。約之以禮。而劉康公云。民受天地之中。以生。所謂命  
也。是以有動作威儀之則。然則君子爲學。舍禮何由。近日講學。

家專以聚徒立幟爲心而其教不肅方將賦茅鴟之不暇何暇其餘尋以乙未春出關觀伊洛歷嵩少曰五嶽遊其四矣會年饑渡河至代北復還華下先生旣負用世之略不得一遂所至輒小試之墾田度地累致千金故隨寓卽饒足徐尙書乾學兄弟甥也未遇時先生振其乏至是鼎貴爲東南人士宗累書迎先生南歸請居以別業皆不至庚申其婦卒於崑山寄詩挽之而已康熙二十年卒於華陰年六十有九無子以從孫洪慎後高弟吳江潘耒刊布其遺書先生耿介絕俗雙瞳子中白而邊黑見者異之最與歸莊善少其遊復社有歸奇顧怪之目於書無所不窺尤畱心經世學歷觀廿一史明十三朝實錄天下圖

經說部。以至公移邸鈔之屬。有關民生利害者。隨錄之。又參以  
躬所聞見。曰天下郡國利病書。別一編曰肇域志。最精韻學。能  
據遺經以正六朝唐人之失。據唐人以正宋人之失。有音學五  
書。李文貞光地。謂自漢晉以來所未有。性喜金石文。所至必躬  
自蒐訪。有金石文字記。晚益篤志六經。謂經學卽理學也。自有  
舍經學言理學者。乃墮於禪學而不自知。故持論悉本朱子之  
說。而歸咎於上蔡橫浦象山。甚峻。有書曰下學指南。其平時論  
學曰。博學於文。曰行。已有恥。謂自一身以至天下國家。皆學之  
事。自子臣弟友。以至出入往來辭受取與之間。皆有恥之事。不  
恥惡衣惡食。而恥匹夫匹婦之不被其澤。故曰萬物皆備於我。

矣。反身而誠。其日知錄三十卷。尤終身精詣之書。凡經史粹言。皆具焉。自言有王者起。將以見諸行事。而躋斯世於古治之隆。而未敢爲近人道也。先生出游。以馬二騾二載。書隨所至。陋塞卽呼老兵退卒。詢曲折。或與平日所聞不合。則卽旅舍中發書勘之。或經行平原大野。無足措意。則馬上嘿誦諸經註疏。偶有遺忘。卽又發書熟復之。汪鈍翁嘗言經學修明者。吾得顧子亭林。李子天生。內行醕備者。吾得魏子環極。梁子曰緝。先生廣之曰。學究天人。確乎不拔。吾不如王寅旭。讀書爲己。探賸洞微。吾不如楊雪臣。獨精三禮。卓然經師。吾不如張稷若。蕭然物外。自得天機。吾不如傅青主。堅苦力學。無師而成。吾不如李中孚。險。

阻備嘗。與時屈伸。吾不如路安卿。博聞強記。羣書之府。吾不如  
吳任臣。文章爾雅。宅心和厚。吾不如朱錫鬯。好學不倦。篤於朋  
友。吾不如王山史。精心六書。信而好古。吾不如張力臣。所著書  
又有左傳杜解補正。九經誤字。石經考異。韻補正。昌平山水記。  
山東考古錄。京東考古錄。亭林詩文集。及二十一史年表。心代  
帝王宅京記。皆行於世。力臣名昭。山陽人。精六書。貧而嗜古。尤  
究心金石。探討靡遺。嘗登焦山。乘江湖歸壑入巖下。仰讀瘞鶴  
銘。證爲顧况書。援據甚核。後以孽廢。而考證彌勤。亭林音學五  
書。力臣所寫定也。任臣吳姓名。志伊仁和人。志行端慤。博聞強  
識。兼精天官樂律。康熙己未。召試博學鴻儒。授檢討。承修明史。

歷志撰十國春秋百十四卷。廣搜博引可稱淹貫。又撰山海經  
廣注字彙補。周禮大義。禮通春秋正朔考辨。託園詩文集。諸書。



王而農先生事略 兄介之 子敬

先生姓王氏諱夫之字而農號薑齋湖南衡陽人父朝聘副貢生以文學知名先生少負異才讀書十行俱下年逾冠與兄介之同舉崇禎壬午鄉試以道梗未與計偕明年張獻忠陷衡州士類多汚偽命其不屈者投之湘江先生走匿南嶽雙髻峯下賊執其父以爲質先生自引刀刺其肢體昇往易父賊見其重創也免之父子俱得脫十七年北京陷先生涕泣不食者數日明年王師下金陵唐桂二王相繼稱號督師何公騰蛟屯長沙堵公允錫駐常德兩公頗不相能先生憂之上書監軍章公曠請調和南北兩軍防潰變章公不能用諸鎮卒奔覆章公以

憂死。順治四年。王師下湖南。先生走桂林。大學士瞿公式耜疏薦於桂王。先生以父憂請終制。服闋。授行人。是時桂王、建國肇慶旋移駐武岡。走靖州、柳州。大學士嚴公起恆皆從。已復從至肇慶。時朝端水火有吳黨、楚黨之目。主吳者爲朱天麟、張孝起、吳貞毓、堵允錫、王化澄諸人。主楚者爲金堡。丁時魁、劉湘客、袁彭年、蒙正發諸人。又其時李承棟新附於王。朝政皆決於其子元允堡等五人。附之。吳黨目爲五虎。嚴公居其閒。不能有所匡正。王在梧州。貞毓等十四人合疏攻五虎。下湘客等於獄。將置之死。先生走告嚴公曰。諸臣棄墳墓捐妻子。崎嶇從王。而以黨人殺之。則志士將解體。誰與共危亡者。嚴公感其言。踴王舟。

力救。貞毓等並惡之。是時化澄已爲言者劫去。貞毓等請召還。因與合攻嚴公。先生亦三上疏。劾化澄。化澄悲甚。必欲殺先生。以救得免。返桂林。復依霍公。尋聞母病。閒道歸。至則母已前卒。其後霍公殉節。桂林嚴公被害。南甯先生知事。愈不可爲。遂決計老牖下。已而緬甸亦覆沒。先生益自晦匿。浪遊郴永。連邵。閒所至。人士慕從。輒辭去。最後歸衡陽之石船山。築土室曰觀生居。晨夕杜門。學者稱船山先生。所著有周易內傳十二卷。發例一卷。周易大象解一卷。周易稗疏四卷。周易考異一卷。周易外傳七卷。書經稗疏四卷。尚書引義六卷。詩經稗疏四卷。詩經考異一卷。詩廣傳五卷。禮記章句四十九卷。春秋稗疏二卷。春秋

家說七卷春秋世論五卷續春秋左氏博議二卷四書訓義三  
十八卷四書稗疏二卷四書考異一卷讀四書大全說十卷說  
文廣義三卷讀通鑑論三十卷宋論十五卷張子正蒙注九卷  
思問錄內篇一卷外篇一卷俟解一卷聖夢一卷黃書一卷識  
小錄一卷老子衍一卷莊子解三十三卷龍溪夜話一卷愚鼓  
歌一卷相宗絡索一卷楚辭通釋十四卷薑齋文集十卷詩集  
十卷詩餘三卷詩話三卷外集四卷夕堂永日八代文選十九  
卷共計三百二十四卷其著錄於四庫者曰周易稗疏考異尚  
書稗疏詩稗疏考異春秋稗疏凡六種存目於四庫者曰尚書  
引義春秋家說凡二種先生論學以漢儒爲門戶以宋五子爲

堂與其所作大學衍中庸衍皆力闢致良知之說以羽翼朱子而於正蒙一書尤有神契謂張子之學上承孔孟如皎日麗天無幽不燭惜其門人未有殆庶者而當時鉅公如文富司馬諸公張子以布衣貞隱無絲資其羽翼其道之行會不逮邵康節之數學是以不百年而異說興於是究觀天人之故推本陰陽法象之原就正蒙精繹而暢衍之與自著思問錄二篇皆本隱之顯原始要終炳然如揭日月至其扶樹道教辨上蔡象山姚江之誤或疑其言稍過然議論精嚴粹然皆軌於正也先生生當鼎革甲申後崎嶇嶺表發譴論攻愼邪備嘗艱險既知事不可爲乃退而著書竄伏窮山四十餘年一歲數徙其處故國之

戚生死不忘。康熙十八年。吳逆僭號於衡。僞僚有以勸進表相屬者。先生曰。亡國遺臣。所欠一死耳。今安用此不祥之人哉。遂逃入深山。作祓禊賦。吳逆平。大吏聞而嘉之。屬郡守饒粟帛。請見先生。以疾辭。未幾卒。葬大樂山之高節里。自題墓碣曰。明遺臣王某之墓。當是時。海內儒碩。推容城塾屋。餘姚崑山先生。刻苦似二曲。貞晦過夏峯。多聞博學。志節皎然。不媿黃顧兩君子。然諸先生肥遯自甘。聲望益熇。雖薦辟皆以死拒。而公卿交口。天子動容。其著述易行於世。惟先生竄身犴。尚席棘飴茶。聲影不出林莽。門人故舊。又無一有氣力者爲之表章。歿後四十年。其子致。抱遺書上之督學。宜興潘太史宗洛。因緣得入。四庫上。

史館立傳儒林。而其書仍不傳。道光庚子。族孫世倅始刻行。咸豐四年。燬於兵燹。同治二年。曾中丞國荃復捐俸重鐫焉。本朝經學家。後先生而起者。無慮百十人。所言皆有根柢。然有矜爲創獲。不知爲先生所已言者。四庫總目。於春秋稗疏中。曾論及之。實未易一二數也。兄介之。字石子。號石崖。鄉舉。後值國變。遂隱居不出。先先生卒。著有周易本義質四卷。詩經尊序十卷。春秋四傳質十二卷。子敬。字虎止。操履高潔。博學有文名。康熙朝貢生。與邵陽車無咎。補廡王元復。能愚。牧縣陳之駉。桃文。稱楚南四家。又稱楚中三王。謂虎止與能愚及漢陽王戩伯穀也。潘太史視學楚南。延虎止入幕。與宜興儲大文。六雅善。晚築湘。

西草堂著有蔗畦存稿及雲草學者稱蔗畦先生



陸桴亭先生事略 葉敦艮 盛敬 江士韶

本朝諸儒恪守程朱家法者推二陸先生爲正宗二陸者一清獻公一桴亭先生也先生名世儀字道威江蘓太倉州人少卽篤志聖賢錢忠介公肅樂牧太倉時一見奇之曰他日必以魁儒名世劉念臺先生講道蕺山張受先采嘗約先生往受學先生卽赴之受先不果終身以爲憾時流寇日熾先生謂平賊在良將尤在良有司宜大破成格凡進士舉貢監諸生不拘資地但有文武幹略者輒與便宜委以治兵積粟守城之事有功卽以爲其地之牧令如此則將兵者所至皆有呼應今拘吏部法重以賄賂隨在充數是賣封疆也時不能用明亡嘗上書南都

不見聽。又嘗參人軍事。既解鑿地。寬可十畝。築亭其中。高臥閉關謝客。其自號桴亭。以此風波既定。至四明哭忠介歸。始應諸生之請。講學東林。已講於毘陵。復歸講於里中。當事者屢欲薦之力辭免。葉敦良者。字靜遠。浙之西安人。戴山高弟也。千里賄書討論。先生喜曰。證人尙有緒言。吾得慰未見之憾矣。先生少嘗從事養生之說。有所得矣。既而翻然悟。乃亟棄之。作格致篇。以自考。曰。敬天者。敬吾之心也。敬吾心。如敬天。則天人可合一矣。故敬天爲入德之門。及讀薛文清書。有云。敬天當自敬心始。乃歎曰。先得我心哉。先生教人。先小學。後大學。以立志居敬爲本。以聖經八條目爲程主。敦守禮法。講明實用。然後漸進於天。

人之微。旁及百家之言。其先後次序。悉朱子遺法也。所著思辨錄。凡十四類。前集曰小學。曰大學。曰立志。曰居敬。曰格致。曰誠正。曰修齊。曰治平。後集曰天道。曰人道。曰諸儒。曰異學。曰經子。曰史籍。自象緯律厯。以至禮樂兵農刑政。河漕鹽屯諸務。以及歷代儒先之異同得失。旁及異端。莫不窮究其所以然。而立論一歸醇正。清獻公嘗序而刻之。其景仰者至矣。先生自序生平。謂得力於理。先於氣。一言於理氣之間。盡心體驗。始知太極爲理。兩儀爲氣。人之義理。本於太極。氣質本於兩儀。理居先。氣居後。理爲主。氣爲輔。條理井然。旣而悟理一分殊之旨。恰與羅整庵之言合。便灑然覺理氣融洽。性原無二。然未察及人與物性。

同異處也。既而知人與萬物之所以同。又知人與萬物之所以異。於朱子所云論萬物之一原則理同而氣異。論萬物之異體則氣猶相近而理絕不同二語大有契入。於是又識得天地萬物本同一體處。然而性善之說則終以先入之言爲主。以爲孟子論善止就天命之初繼之者善處論。未敢說到成之者性。既而悟成之者性以前著不得性字。既云成之者性。便屬氣質。既屬氣質。何云性善。於是曠覽天人之原。博觀萬物之際。見夫異異而同同者。始知性爲萬物所同。善爲人性所獨。性善之旨正不必離氣質而觀也。乃取孟子前後論性語反覆讀之。始知孟子當日止就氣質中說善。而程朱以後尙未之能晰也。於是又

取宋五子之言觀之周則無不脗合程朱閒有一二未合而合者嘗八九也周子太極圖說惟人也得其秀而最靈形既生矣神發知矣形生質也神發氣也形生神發而五性具是有氣質而後有性也可見不落氣質不可謂之性一言性便屬氣質矣先生不喜新會餘姚之學顧能洞見其得失之故而平心以論之尤足廢諸家紛爭之說其論白沙曰世人多以白沙爲禪宗非也白沙會哲之流其意主於灑脫閑曠以爲受用不屑苦思力索其靜中養出端倪之說亦本中庸然不言戒懼慎獨而惟詠歌舞蹈以養之則近於手持足行無非道妙之意矣白沙與敬齋俱學於吳康齋本皆以居敬爲主故其詩曰吾道有宗主

千秋朱紫陽說敬不離口示我入德方後來自成一家始以自然爲宗而敬齋則終身無所轉移是以有狂狷之分也究之所謂自然者誠也稍有不誠則粉飾造作便非自然而或者以率略放達爲自然非也其論陽明曰陽明之學原自窮理讀書中來但才氣過高終屬聰明用事其言朱子格物之非謂嘗以庭前竹試之七日而病是則禪家參竹篋之法原非朱子格物之說陽明自誤會耳陽明意主簡易直捷以救支離之失故聰明者喜從之而一聞簡易直捷之說則每厭讀書窮理之繁動云一切放下而居敬之功弛矣故陽明在聖門狂者之流門人昧其苦心以負之耳其論整庵曰陽明講學在正德甲戌乙亥間

整庵困知記一書作於嘉靖戊子己丑之際。整庵自謂年垂四十始志學。正陽明講學時也。其後致良知之說遍天下。而整庵書始出。然則非陽明講學。則整庵將以善人終其身。而是書且不作。朋友切磋之功。其可少哉。陽明工力不逮整庵之半。整庵才氣不逮陽明之半。於整庵吾恨其聰明少。於陽明吾恨其聰明多。其論陽明弟子曰。姚江弟子必以緒山爲巨擘。其序傳習錄。謂師亡未及三紀。而微言日以沈晦。豈非吾黨身踐之不力。而多言有以病之耶。此蓋爲龍溪而發。而救正王學末流之功甚大。是不負陽明者。緒山也。終背陽明之教者。龍溪也。又嘗語學者曰。世有大儒。決不別立宗旨。譬之大醫。國手無方。不備。豈

嘗沾沾然執一海上方而調舍此更無方無藥哉。今之談宗旨者皆海上方也。所著自思辨錄外有宗禮典禮折衷治通治鄉三約甲申臆儀城守要略八陣法門先儒語錄集成明儒語錄集成禮衡易窺詩鑑書鑑春秋考論讀史筆記考德錄諸書同州共學者曰盛先生敬江先生士韶。

敬字宗傳號寒溪長桴亭先生一歲年十五遇桴亭一見卽甚相得與同學者三年厭薄聲華不事舉子業後羅家阨流離播徙去稍遠至崇禎丙子始與桴亭及陳子確庵江子藥園有講學之舉時絕學初興慮驚世駭俗深用韜秘四人者風雨聯牀或橫經論難或卽事窮理反覆以求一是甚有商榷未定徹夜



忘寢質明而後斷。或未斷而復辨者。既而同志漸多。旬月皆有  
常會。會必講貫終日。凡身心性命之奧。天文地利河渠兵法之  
學。太極陰陽鬼神之秘。儒釋之辨。經史百家之蹟。罔弗根究本  
末。要於中正。講論之樂。嘗恨古人不及見之。退則倣先儒讀書  
記之法。各有所錄。旬日不著錄。卽互相糾。以爲學問進退之別。  
桴亭所著思辨錄。皆十二年閒。俛讀仰思有所見。則疾書以自  
識。其所得者也。顧其所紀皆隨筆。無倫次。寒溪與藥園乃纂輯  
精要。類分而書之。藥園名士韶。子虞九。其學以桴亭爲歸。所纂  
思辨錄輯要。寒溪既序其體例。藥園復序之。其略曰。自結繩以  
降。太昊始之。皇農諸聖人繼之。而集諸聖之大成者。有孔子。漢

唐以隆濂溪始之。洛閩諸大儒繼之。而集諸儒之大成者。有朱子。然自朱子以後。羣言淆亂。莫知折衷。其溺於詞章。牽於訓詁者。無論已。自禪學盛。而二氏標榜。於是異學與正學爭。自心宗盛。而三教合一。於是儒者與儒者爭。浸淫至於末季。所推儒門巨擘。大約爲異端立赤幟耳。或樹敵門外。或操戈室中。其指似異。其害實同也。桴亭之爲是書。無閒寒暑。無閒窮達。無閒治亂。蓋十二年如一日。皆爲衛道計耳。則繼朱子而集大成者。桴亭何多讓焉。嗚呼。此心同也。此理同也。桴亭言之。而天下萬世之人。誦之習之。或從而歌舞詠嘆之。以是爲桴亭功。桴亭言之。而天下萬世之人。疑之阻之。或從而訕笑詬厲之。以是爲桴亭罪。

而皆無容心也。道存與存。道亡與亡。聽之天而已矣。庶幾藏之名山。傳之其人。以俟天下萬世之知桴亭而能讀是書者。

張楊園先生事略

何汝霖

凌克貞

吳嘉玲

陳梓

先生名履祥字考夫居桐鄉之楊園村學者稱楊園先生九歲喪父擗踊祖括如成人母夫人訓之成立嘗中酒母責之且諭曰孔孟亦是兩家無父兒止爲肯學好人便成大聖大賢爾勿自棄也年十五補邑諸生恥入社讀小學近思錄有得作願學記渡江而東拜劉念臺先生門下聞甲申三月之變縞素不食攜書麓步歸楊園隱約間修益肆力程朱之書覺人諧獨體之說猶近陽明然以師故不敢言也澉湖何商隱延之家塾出傳習錄請評先生不敢任旣而館語水主人以請復辭之後數年始毅然奮筆條分縷析直抉其所以然蓋自此書出而閑關錄

困知記學。通辨皆所謂擇焉不精者矣。吳江張嘉玲棄諸生。從先生遊。資獨敏。故所詣彌粹。先生自亂後。益杜門寡交。病常世。講學者。駢口辯沽虛名。故於來學之士。未嘗受其拜。一以友道處之。與茗上凌渝安沈石長及商隱交最篤。往復終身。無間。平居雖盛暑。方巾深衣。端拱若泥塑。或舟行百里。坐不少歇。晚年爲寒風。伫立圖自題。以見志。嘗云。三代以上折衷於孔孟。三代以下折衷於程朱。於通鑑綱目。朱子文集語類。晨夕不去手。旁及讀書居業二錄。童蒙訓。魯齋集。皆有評本。輯劉子粹言於師門。有補救之力。念臺之子伯繩。輯先人遺書。多折衷於先生。時黃太冲方以紹述。戡山鼓動天下。先生曰。此名士。非純儒也。

痛先世殯宮以貧不能早葬燬於盜雖罪人既得斬首祭墓和衣猶靡麻卒於康熙十三年年六十有四遺命以衰殮濮川布衣陳梓爲作傳輯年譜門人祝淦彙刻其全集目次凡十六曰經正錄曰願學記曰問目曰備忘錄曰詩曰書曰初學備忘曰學規曰訓子語曰答問曰門人所記曰言行聞見錄曰近古錄曰近鑑曰喪祭雜說曰農書先生恪守紫陽居敬窮理之訓實體諸人倫日用開在前明爲薛胡之後勁在本朝爲清獻之前茅身處草野日抱發憂荒江寂寞中惴惴念亂其心固未嘗一日忘天下也嘗言人自著衣至於解衣終日之間所言所行須知有多少過差自解衣至於著衣終夜之間所思所慮須知

有多少邪妄有則改之此爲修身第一事又曰爲學自不欺始不欺自親長始於親長忍用其欺安往而不欺者又曰朱子精微象山簡率薛胡謹嚴陳王放曠今人多舍朱從陸尊陳王詘薛胡固由人情便簡率而苦精詳樂放曠而畏謹嚴亦緣百餘年來陽明之學大行遂以先入之言爲主雖閒讀程朱書亦止本陸王之意指摘其短長而已此種習尙不變竊憂生心害政之禍未有艾也又曰學者舍稼穡別無治生之道能稼穡則無求於人而廉恥立知稼穡艱難則不敢妄取於人而禮讓興廉恥立禮讓興而世道可以復古矣故其所補農書皆得諸身試者何商隱名汝霖武原人凌渝安名克貞沈石長名磊皆烏程

人吳嘉玲字佩慈一字帖瞻陳梓字古民祝淦字人齋海昌人  
商隱嘗曰楊園學術至正言行無疵至其不言而飲人以和與  
人並立而使人化尤莫知其所所以然也凌先生曰楊園闇修一  
室而聞風者悅服覲德者心醉惟其誠耳陳古民曰先生純粹  
如敬軒而研窮精核謹飭如敬齋而規模宏遠人齋祝氏旣刻  
其遺書復擇粹語爲一編曰淑艾錄以示學者陸清獻公未獲  
與先生相接及見其遺書乃心折焉



張蒿庵先生事略

孫若羣

齊魯自伏生轅固而還至東京之末康成鄭氏始爲諸經箋注號稱經師爰及北宋乃有泰山孫明復徂徠石守道特起爲人倫師表越六百年復有蒿庵張先生先生名爾歧字稷若濟陽人明季爲諸生入本朝隱居求志當正學昌明之日博綜載籍以篤志力行爲本性孝友報親喪三年號泣不輟殯葬皆遵古禮以沃產讓兩弟爲代納賦稅三十餘年及易簣猶屬子代納以終二弟之身爲其有廢疾也卒於康熙十六年年六十有六當是時孫鍾元講學蘇門黃梨洲標宗姚江皆出入白沙陽明間先生獨守程朱說不少變海內君子如桐鄉張考夫太倉

陸道威各以韋布躬行任斯道之重先生縞紵未通而風期合  
轍隱然有以開陸清獻張清恪之先故崑山顧亭林亦時以康  
成泰山徂徠三先生相勸先生閉戶著書所與游自亭林外惟  
長山劉友生樂安李象先關中李二曲王山史四人而已乾隆  
中詔徵海內遺書其鄉人以先生所著書上當事進冊府海  
岱經生益知先生爲三先生以後一人吳江陸朗夫燿陳臬山  
東建蒿庵書院以祀先生而額其堂曰辨志取先生所論著以  
立教也其辨志略曰人之生未始有異也而卒至大異者習爲  
之也習之所以異志爲之也志異而習以異習異而人以異故  
志乎道義未有入於貨利者也志乎貨利未有幸而爲道義者

也。志道義則每進而上。志貨利則每趨而下。其端甚微。其效甚巨。舜蹠之分。利與善之間而已。人之所以孳孳而爲者。志在故耳。志之爲物。往而必達。圖而必成。及其旣達。則不可以返也。旣成。則不可以改也。於是爲舜者。安享其爲舜。爲蹠者。縱自悔其爲蹠而已。莫可致力矣。所志者殊也。世之誦周公孔子之言者。肩相比也。周孔之教。未聞有見諸行事者。豈少而習之。長而忘之。與。毋亦誦周孔而志不在周孔也。志不在周孔。則所志必貨利矣。以志在貨利之人。而乘富貴之資。制斯人之命。吾悲民生之曰蹙也。志之定於心也。如種之播於地也。種梁菽。則梁菽種。烏附。則烏附矣。雨露之滋培。壅之力。各於所種。以成效焉。梁菽。

成則人賴以養。烏附成則人被其毒。學不正志而勤其佔畢。美其文辭。以售於世。則所學皆其毒。人自利之藉也。嗚呼。學者一日之志。天下治亂之源。生人憂樂之本矣。且夫志在道義。未有所不得乎道義者也。窮與達均得焉。志在貨利。未必貨利之果得也。而道義已坐失矣。孟子曰。求在我者也。是求有益於得也。求在外者也。是求無益於得也。能審乎內與外之分。必得與不必得之數。可以定所志矣。其中庸論略曰。中庸云者。贊禮之極辭也。中庸一書。禮之統論約束也。夫禮抑人之盛氣。抗人之懦情。以就於中。天下之人。質之所不使。皆不能安不安。恐遂爲道裂。指禮之物而贊以坦易之辭。以究其說於至深至大至盡之地。

所以堅守禮者之心而統之一途也由禮而後喜怒哀樂皆可  
以中節中節而後可以爲中庸故其言始之天命以著從來曰  
斯禮也命與性先之矣不然不汝強也極之彝倫典則以表大  
業曰斯禮也帝王之所考名教之所責無之或二也要之誠明  
以立本事曰斯禮也非明無以通微非誠無以正隱非所以爲  
外也於是使愚不肖者知所遠而賢智者亦厭其意而不敢求  
多焉此中庸之書所以繼六經而鞭其後也盡六經之說而後  
可以究理之說而後可以究中庸之說中庸者禮之統論約說  
非其詳者也而孔子之告顏子曰克己復禮爲仁仁不得禮無  
以爲行并無以爲存也吾故斷以爲中庸必有所指而所指斷

乎其爲禮也。漢儒取以記禮爲得解矣。先生所著有夏小正傳  
註一卷。儀禮鄭注句讀十七卷。儀禮考注訂誤一卷。弟子職注  
一卷。周易說略四卷。春秋傳義四卷。蒿庵集三卷。蒿庵閒話三  
卷。顧亭林嘗曰。獨精三禮。卓然經師。吾不如張稷若。又曰。穆若  
所著儀禮鄭注句讀。根本先儒。立言簡當。以不求聞達。故無當  
世名。然書實可傳。使朱子見之。必不僅謝監獄之稱許也。同時  
有孫先生若羣者。潯川人也。少勵品學。言動皆有則。鄉里稱小  
聖人。早歲成進士。謁選京師。任侍郎克溥。延之課子。坐不易牀。  
食不兼豆。雖盛暑亦衣冠危坐。如見大賓。侍郎知其二子應童  
子試。時山左學使與侍郎交善。將爲之地。而不知二子名。屢欲

問之憚其嚴終不敢發善評隲窮通壽夭皆能以丈決之康熙  
癸丑知交城縣事遺其子歸涵就昏去後見其近作時藝嘆曰  
吾子其不反矣歸後竟卒治交多異政秩滿遷四川知州卒於  
官